



Broj/Број: 01/7-50-1-7-2-34/06
Sarajevo/Сарајево: 6.3.2006.

ZAPISNIK

34. sjednice Administrativne komisije Predstavničkog doma Parlamentarne skupštine Bosne i Hercegovine, održane u zgradi institucija BiH, 6.3.2006. godine, s početkom u 10,30 sati

PRISUTNI ČLANOVI KOMISIJE: Senija Kapetanović, Dušanka Majkić, Mubera Ušanović, Hazim Felić, Jozo Križanović, Vinko Zorić i Ruža Sopta .

ODSUTNI ČLANOVI KOMISIJE: Momčilo Novaković i Mladen Potočnik.

Trideset četvrtom sjednicom Administrativne komisije Predstavničkog doma Parlamentarne skupštine Bosne i Hercegovine **predsjedavala je Senija Kapetanović**, predsjedavajuća Administrativne komisije Predstavničkog doma Parlamentarne skupštine Bosne i Hercegovine.

Za sjednicu je predložen sljedeći

DNEVNI RED

1. Usvajanje Zapisnika 33. sjednice Administrativne komisije;
2. Razmatranje Izvještaja o radu Administrativne komisije za period 1.7.-31.12.2005. godine;
3. Razmatranje dopisa Kolegija Predstavničkog doma Parlamentarne skupštine Bosne i Hercegovine, broj: 01-50-1-24-81/06, od 15. 2.2006. godine;
4. Razmatranje sugestije poslanika Mehmeda Suljkanovića;
5. Razmatranje poslaničkog pitanja poslanika Ive Lozančića;
6. Razmatranje Prijedloga za donošenje odluke o isplati naknade za 8. mart;
7. Dostava Uvjerenja o položenom kursu engleskog jezika po Odluci Administrativne komisije, broj: 01/7-50-1-52-4-28/05, od 30.6.2005. godine;
8. Tekuća pitanja.

Trideset četvrtu sjednicu Administrativne komisije Predstavničkog doma Parlamentarne skupštine Bosne i Hercegovine otvorila je predsjedavajuća sjednicom Senija Kapetanović i predložila dnevni red, te pozvala prisutne članove Administrativne komisije da se izjasne o njemu, odnosno da daju primjedbe, prijedloge i sugestije.

S obzirom da nije bilo primjedbi i prijedloga, prisutni su jednoglasno usvojili predloženi dnevni red.

Nakon usvajanja dnevnog reda trideset četvrte sjednice Administrativne komisije Predstavničkog doma Parlamentarne skupštine Bosne i Hercegovine, pristupilo se njegovom razmatranju po utvrđenim tačkama.

AD-1 Prisutni su jednoglasno bez primjedbi usvojili Zapisnik 33. sjednice Administrativne komisije Predstavničkog doma Parlamentarne skupštine Bosne i Hercegovine.

AD-2 Uvodno obrazloženje uz ovu tačku dnevnog reda dala je predsjedavajuća sjednicom Senija Kapetanović i predložila da se utvrdi način na koji će se raditi Izvještaj za period 1.7.-31.12.2006. godine.

Ruža Sopta stavila je primjedbu da je u Nacrtu Izvještaja trebalo pobrojati opravdane izostanke.

Duška Majkić je pitala je zašto neko iz stručnih službi ne prisustvuje današnjem sastanku jer smatra da to nije samo Izvještaj Administrativne komisije. Zatim se osvrnula na neke konstatacije u Nacrtu izvještaja naglasivši da su proizvoljne i da nisu jasne, pa predstavljaju paušalne ocjene, kao što je konstatacija na strani 4. pasus 5. Istakla je da se u dijelu koji govori o prisustvu sjednicama trebalo navesti koliko je bilo opravdanih izostanaka i naglasila da na Nacrt ima dosta primjedbi, a da smatra da Nacrt izvještaja treba biti koncizniji i bez detalja.

Hazim Felić je također naglasio da u Nacrtu ima MNOGO nepotrebnih detalja, a da se prisustvo sjednicama ne treba prikazivati onako kako je prikazano već da treba samo reći koliko je sjednica održano i uz to navesti procenat prisustva sjednicama. Naveo je da su nepotrebni detalji o radu Administrativne komisije, tako da Izvještaj treba da bude na 4-5 strana jer se duži izvještaji ne čitaju, a detaljan izvještaj, između ostalog, može otvoriti i nepotrebna pitanja. Smatra da u Izvještaju nema potrebe objašnjavati šta i kako se radilo u navedenom periodu.

Vinko Zorić podržao je prethodne rasprave naglasivši da pitanje prisustva nije upitno ako su održane sjednice i da ga treba istaći samo u slučaju ako sjednice nisu održane zbog nedostataka kvoruma.

Mubera Ušanović je, govoreći o prisustvu sjednicama i podacima o tome, spomenula komisije u kojima je nedolazak na sjednice stvarni problem, pa je rekla da treba da u izvještaju stoji procenat od 84,37% i 69,84 za zajedničke sjednice, a u Izvještaju po pojedinim oblastima iz nadležnosti Administrativne komisije treba eliminirati konkretne stvari da one ne bi otvorile brojna pitanja.

Senija Kapetanović istaknula je da je saglasna da ovaj izvještaj treba biti kraći i s manje detalja. U vezi s prisustvom, istakla je da ne postoji običaj da se pravdaju izostanci, a Administrativna komisija ima i terminsku uslovljenost u rješavanju nekih pitanja, posebno kad odlučuje o pravima iz radnog odnosa. Što se tiče drugog dijela Izvještaja u kojem se govori o nadležnostima, istakla je, s obzirom na dopis Kolegija Predstavničkog doma Parlamentarne skupštine Bosne i Hercegovine, da smatra da se treba objasniti rad Administrativne komisije i odluke koje je donijela. Što se tiče primjedbe u vezi s osiguranjem radnika, podsjetila je da je ovo pitanje pokrenuto krajem prošle godine, a pošto je ovo izvještaj za prošlu godinu, to je u njemu i napisano.

Duška Majkić replicirala je da Administrativna komisija ne treba da bude faktor povezivanja između sekretara i stručnih službi, te da sekretar treba da sarađuje sa stručnim službama. Naglasila je da se izvještaj pravi za Parlament i da ne treba na Parlamentu da se otvora diskusija, posebno što smatra da nije način da Administrativna komisija konstatira da Vijeće ministara BiH nije donijelo nijedan podzakonski akt u skladu sa Zakonom o radu u institucijama Bosne i Hercegovine, a ne bi bilo ni mudro tako reći. Zato smatra da ovaj nacrt izvještaja treba pažljivo pretesti. U njemu treba navesti šta se uradilo od planiranih aktivnosti, a šta nije.

Vinko Zorić naglasio je da će se još raspravljati o Izvještaju, ali da u njemu svakako treba reći da Administrativna komisija nije razmatrala zakon o plaćama i zakon o pravima i dužnostima poslanika, odnosno da je odbila Nacrt zakona o plaćama u institucijama Bosne i Hercegovine. Istakao je da navedenim zakonom treba da se urede pitanja penzija, a da u izvještaju treba ukazati na potrebu donošenja jednog takvog zakona.

Senija Kapetanović završila je raspravu o ovoj tački dnevnog reda i pozvala Kolegij Administrativne komisije da učestvuje u izradi Nacrta izvještaja koji će biti razmatran na narednoj sjednici.

Vinko Zorić predložio je da se, u skladu s primjedbama, sačini novi nacrt izvještaja i pošalje članovima Kolegija Administrativne komisije koji će ga pogledati i dostaviti svoje primjedbe kako bi one bile ugrađene u novi nacrt izvještaja.

AD-3 Uvodno izlaganje o ovoj tački dnevnog reda dala je predsjedavajuća sjednicom Senija Kapetanović.

Vinko Zorić je rekao da se u ovom slučaju radi o dvije odluke od kojih je jedna predsjedavajućeg Vijeća ministara BiH koju je ova Komisija ispoštovala, s tim da je jedna od tačaka bila da se pravo iz odluke ostvaruje tamo gdje je član Radne grupe zaposlen, a druga je da se članovima komisija koje ne imenuje Parlamentarna skupština Bosne i Hercegovine već se konstituiraju od članova Administrativne komisije, Visokog sudskog i tužilačkog vijeća i članova Izborne komisije BiH isplati naknada za rad, naglasivši da Komisija može donijeti odluku da se ova sredstva isplate. Istakao je da je Administrativna komisija određivala plaće članovima Izborne komisije BiH, pa je Komisija i donijela navedenu odluku utvrdivši koeficijent 1 za obračun naknade za rad u Ad hoc komisiji za izbor i imenovanje, a imajući u vidu činjenicu da je i sekretar rekao da ovu komisiju nije osnovala Parlamentarna skupština Bosne i Hercegovine. Naglasio je da mu je u Dopisu Kolegija Predstavničkog doma Parlamentarne skupštine Bosne i Hercegovine zaparala uši riječ "moralnih" na osnovu koje se može zaključiti da su odluke nemoralne, a da on smatra da se pitanje naknade treba riješiti i ako se članovi Administrativne komisije dogovore da neko drugi bude član Ad hoc komisije, pa je zaključio da treba staviti naglasak na riječ "moralnih".

Senija Kapetanović pitala je prisutne - da li žele komentirati zaključak predložen u materijalu uz ovu tačku dnevnog reda ili nešto dodati.

Ruža Sopta istakla je da ovaj dopis, kao i poruke koje dobiva ova Komisija, da je ona neozbiljna, a što se zasniva na činjenici da se nije ušlo u bit problema u vezi s navedenim odlukama. Smatra da se Komisija dovodi pred svršen čin ovakvim ocjenama, a ona ne vidi razloga za ovakvu ocjenu i korištenu terminologiju u ocjeni donosenih odluka, kao ni dovodenja Komisije u trenutnu situaciju prouzrokovanu Dopisom. Misli da član Kolegija Predstavničkog doma Parlamentarne skupštine Bosne i Hercegovine ne može poslati pismo u kojem izjavljuje da se odluka donosena na Administrativnoj komisiji na njega ne primjenjuje. Rekla je da su Komisije donijele odluku kojom se pokrivaju troškovi korištenja mobilnog telefona u inozemstvu, pa ne vidi razloga da Kolegij Predstavničkog doma Parlamentarne skupštine Bosne i Hercegovine čita bukvicu Administrativnoj komisiji, a da je zbunilo upozoravanje na nešto što Komisija nije uradila.

Dužanka Majkić rekla je da je odluka Kolegija Predstavničkog doma Parlamentarne skupštine Bosne i Hercegovine ishitrena, osvrnuvši se na poziciju poslanika koji, prema mišljenju Kolegija Predstavničkog doma Parlamentarne skupštine Bosne i Hercegovine, treba da rade bez naknade u komisijama, radnim grupama i ekspertnim timovima dok u drugim institucijama Bosne i Hercegovine lica za taj rad treba da dobivaju naknadu. Naglasila je da bi voljela vidjeti spisak lica koja rade u komisijama ako se pri tome zna da su neki poslanici koji su radili u jednoj komisiji dali ostavku, pa sad ne rade ni u jednoj obaveznoj komisiji Doma. Smatra da treba razgovarati o ad hoc komisijama naglašavajući da niko ne može biti član više od jedne ad hoc komisije. U vezi sa zaključkom u predloženom materijalu, predložila je da se on dopuni tako što će se u stavu 2. predloženog zaključka navesti da prilikom donošenja odluka o osnivanju komisije i sl. treba obavezno navesti članove, trajanje rada, naknadu i sl.

Vinko Zorić upoznao je prisutne o tome da postoji razmišljanje da Ad hoc komisija za izbor i imenovanje, zbog vakuma koji će nastati s obzirom da je ovo izborna godina, raspiše konkurs i obavi postupak imenovanja u septembru.

Dušanka Majkić naglasila je da je potrebno u budžetu predvidjeti sredstva za naknade članovima komisija, radnih grupa i ekspertnih timova, jer njihovo nepostojanje u budžetu problematizira njegovo izvršenje.

Vinko Zorić rekao je da ga je iznenadila odluka predsjedavajućeg Vijeća ministara BiH jer nije vjerovao da ministri naplaćuju rad u komisijama, radnim grupama i ekspertnim timovima, kao i da se osnivaju radne grupe za izradu akta ili rad na različitim projektima.

Dušanka Majkić istakla je da je Kolegij Predstavničkog doma Parlamentarne skupštine Bosne i Hercegovine najavio sastanak s Komisijom prijetećim tonom, a da ona smatra da je sramota da se šalju ovakvi dopisi Komisiji.

Vinko Zorić podržao je navedeni stav Dušanke Majkić, koja je u nastavku svoje rasprave rekla da, ako bi se išlo u dubinu problema, onda bi se došlo do zaključka da se u navedenom slučaju ne može imati dvostruki aršin za isti problem.

Vinko Zorić je naglasio da je za njega član Kolegija Predstavničkog doma Parlamentarne skupštine Bosne i Hercegovine svetinja.

Mubera Ušanović je naglasila da su sve odluke Administrativne komisije koje se odnose na troškove limitirane, a da je jedino odluka o naknadi za plaćanje troškova mobilnog telefona bez limita.

Hazim Felić istakao je da je problem što je jedan član Kolegija Doma naroda Parlamentarne skupštine Bosne i Hercegovine donio račun za dva mobilna telefona.

Ruža Sopta rekla je da član kolegija ne smije imati dva mobilna telefona naglasivši da su Komisije odlučile da se priznaju troškovi mobilnog telefona. Istakla je da svaki ured i sekretarica u njemu imaju pravo na neograničene troškove. Informirala je prisutne da, prema njenima saznanjima, Kanadani imaju dva puta veći paušal od plaće kako bi mogli pokriti troškove koje imaju kao poslanici.

Hazim Felić naglasio je da Komisija može tražiti podatak da se vidi kako se odluke Komisije provode.

Nakon rasprave, Senija Kapetanović predložila je zaključak s dopunom stava 2. i dala ga na glasanje. Prisutni su jednoglasno donijeli

ZAKLJUČAK

Administrativna komisija također smatra da je potrebno održati zajednički sastanak s Kolegijem Predstavničkog doma Parlamentarne skupštine Bosne i Hercegovine na kojem bi se razmotrile zajedničke odluke Administrativne komisije i Komisije za finansijske i administrativne komisije Doma naroda Parlamentarne skupštine Bosne i Hercegovine o izmjenama i dopunama akata Parlamentarne skupštine Bosne i Hercegovine, kao i pojedinačne odluke Administrativne komisije donesene na osnovu tih akata.

Administrativna komisija također smatra da je potrebno prilikom donošenja odluka o osnivanju komisije, radne grupe, ekspertnog tima i sl., voditi računa da se u odlukama naznači pravni osnov, sastav navedenog tijela, radni zadatak, rok u kojem treba izvršiti zadatak, te naknada za rad njegovih članova.

Administrativna komisija također smatra da je potrebno na zajedničkoj sjednici kolegija oba doma pokrenuti pitanje specifikacije prava i obaveza poslanika i delegata koji se nalaze na stalnom profesionalnom radu u Parlamentarnoj skupštini Bosne i Hercegovine, te u skladu s tim i pitanje izmjena i dopuna Zaključka, broj: 01-011-1358/02, od 3.1.2003. godine, Predstavničkog doma kao i zaključka Doma naroda Parlamentarne skupštine Bosne i Hercegovine.

AD-4 Uvodno obrazloženje o ovoj tački dnevnog reda dala je Senija Kapetanović.

Ruža Sopta je u vezi s ovom tačkom dnevnog reda rekla da je saznala da poslanici primaju različite plaće s obzirom da je Republika Srpska utvrdila da se na sva primanja plaćaju porezi i doprinosi.

Hazim Felić podsjetio je prisutne da nije u nadležnosti Administrativne komisije razmatranje pitanja oporezivanja plaća i naknada.

U skladu s navedenim prisutni su jednoglasno donijeli

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine nije nadležna za davanje preporuka Računovodstvu Parlamentarne skupštine Bosne i Hercegovine u vezi s oporezivanjem primanja zaposlenih u Parlamentarnoj skupštini Bosne i Hercegovine.

AD-5 Uvodno obrazloženje o ovoj tački dnevnog reda dala je Senija Kapetanović. Rasprave o ovoj tački dnevnog reda nije bilo. Prisutni su jednoglasno utvrdili

ODGOVOR

Odredbama člana 42. Poslovnika Predstavničkog doma Parlamentarne skupštine Bosne i Hercegovine nisu date u nadležnost Administrativnoj komisiji bilo kakve zakonodavne aktivnosti. Članom 81. Poslovnika Predstavničkog doma Parlamentarne skupštine Bosne i Hercegovine utvrđeno je ko sve može biti predlagač zakona, pa ako dođe u parlamentarnu proceduru prijedlog zakona o pravima članova Parlamentarne skupštine Bosne i Hercegovine i ako Kolegij Predstavničkog doma Parlamentarne skupštine Bosne i Hercegovine odredi Administrativnu komisiju kao nadležnu, ona će razmotriti takav prijedlog zakona.

AD-6 Uvodno obrazloženje o ovoj tački dnevnog reda dala je Senija Kapetanović i sekretar Administrativne komisije Davorka Čaplinski. Prisutni su upoznati o tome da je upućen dopis Kolegiju Predstavničkog doma Parlamentarne skupštine Bosne i Hercegovine da o navedenoj odluci da svoje mišljenje, s obzirom da ovo pitanje nije regulirano aktima Parlamentarne skupštine Bosne i Hercegovine. Imajući u vidu činjenicu da Kolegij zasjeda u 13 sati, a da se sjednica Administrativne komisije održava prije navedenog termina, predloženo je da Administrativna komisija da načelnu saglasnost za donošenje odluke ne izjašnjavajući se o iznosu, s tim da se ovlasti predsjedavajuća Administrativne komisije da potpiše odluku u skladu s prijedlogom Kolegija Predstavničkog doma Parlamentarne skupštine Bosne i Hercegovine.

U vezi s navedenom odlukom Vinko Zorić pitao je zašto da se naknada isplati ženama, izjasnivši se da će on podržati navedenu odluku.

Vinko Zorić je u vezi s prijedlogom predsjedavajuće rekao da prisutni treba da se izjasne o prijedlogu načelno da su za navedeni iznos, a da se predsjedavajućoj da ovlaštenje da potpiše odluku u skladu s mišljenjem Kolegija Predstavničkog doma Parlamentarne skupštine Bosne i Hercegovine.

Na osnovu mišljenja Kolegija Predstavničkog doma Parlamentarne skupštine Bosne i Hercegovine, donesena je sljedeća

ODLUKA
o novčanoj naknadi povodom 8. marta, Međunarodnog dana žena

I.

Administrativna komisija Predstavničkog doma Parlamentarne skupštine Bosne i Hercegovine odlučila je da se povodom 8. marta, Međunarodnog dana žena, svim ženama, zaposlenim u Parlamentarnoj skupštini Bosne i Hercegovine, isplati po 150 KM.

II.

Za realizaciju ove odluke zadužuje se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja.

Ad-7 Uvodno izlaganje o ovoj tački dnevnog reda dala je Senija Kapetanović.
Prisutni su jednoglasno donijeli

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine primila je k znanju informaciju Ljiljane Milićević o položenom kursu engleskog jezika.

Nakon što je iscrpljen dnevni red, trideset četvrta sjednica Administrativne komisije Predstavničkog doma Parlamentarne skupštine Bosne i Hercegovine završena je u 12 sati.

Sekretar
Administrativne komisije
Davorka Čaplinski

Predsjedavajuća
Administrativne komisije
Senija Kapetanović